



GEMEINDE/VISCHNAUNCA
DISENTIS/MUSTÉR

Cussegli da vischnaunca
6-2017/2020

Revisiun parziale dalla planisaziun locala

Damonda da credit

M E S S A D I

dalla suprastonza communal al cussegli da vischnaunca

Preziau signur president
Preziadas signuras cusseglieras
Preziai signurs cussegliers

1. Historia

Schegie che la lescha federala pil svilup dil territori ei en entrada pér igl onn 1979 en vigur, dateschan l'emprema planisaziun locala e la lescha da bagheggiar dalla vischnaunca da Mustéria digl onn 1975. Il cantun Grischun haveva già baul intervegniu sil sectur dalla planisaziun

territoriala. Probablamein haveva la Regenza anflau per indicau d'intervegnir a vesta da certs excess sil sectur da construcziun. Pli e pli ei la planisaziun territoriala s'avanzada ad in bal da giugar dallas organisaziuns digl ambient. La planisaziun territoriala ei buca vognida pli sempla a vesta dils multifars basegns e giavischs da terren e las pretensiuns dallas organisaziuns digl ambient. Tonpli che las organisaziuns digl ambient han sil palancau dalla planisaziun territoriala survegniu dapli peisa che las vischnauncas pertuccadas. Quei svilup sil sectur dalla planisaziun territoriala lai presupponer pauc bien per nusauters.

Per saver entscheiver cun las preparativas da questa revisiun ha il cussegli da vischnaunca eligiu ils 24 da mars 2017 ina cumissiun preparatoria.

2. Actualitat

El messadi nr. 31-2013/2017 ha la suprastanza communalia gia giu preannunziau ina secunda etappa dalla revisiun parziale della planisaziun locala. L'emprema etappa ei vognida approbada a caschun dalla votaziun dil pievel ils 27 da november 2015. Muort las protestas dallas organisaziuns digl ambient encunter ils stabiliments da far neiv, ei l'approbaziun da quei project entrais la Regenza grischuna vognius partius en duas parts. Ils 5 da fenadur 2016 ha la Regenza approbau la nova zona speciala Catrina, l'adattaziun dalla zona speciala Disentiserhof, cun resalvas e restricziuns la zona da mistregn Pignola/Marias sco era entginas adattaziuns dalla zona da baghegiar enteifer il vitg. L'approbaziun dalla secunda part dil project da revisiun, ils stabiliments da far neiv, ei aunc adina pendenta. Actualmein ha in'ulteriura procedura da consultaziun giu liug. El rom da quella consultaziun han las Pendicularas anflau ina sligaziun cul WWF Grischun chiei vognida definida en ina cunvegnientscha e suttascreta da tutt pertuccai. Ussa schai il bal puspei tiels uffecis cantunals. Schebein la Pro natura vogn a saver s'accordar cun la cunvegnientscha anflada cul WWF, vogn il temps a mussar. Nus spitgein che la Regenza approbeschi quella secunda part dall'emprema etappa aunc avon las vacanzas da stad 2017, aschia che las Pendicularas savessen inoltrar la damonda da baghegiar per ch'igl emprem project savess vognir realisaus sin l'entschatta dalla proxima sesiun d'unviern.

Igl ei denton buca exclus ch'il departament cumpetent decida da suttametter las adattaziuns aunc inagada alla votaziun dil pievel, avon che la Regenza decidi. En quei cass vogness la realisaziun dils satbiliments a s'entardar.

3. Planisaziun directiva

Sco gia menziunau el messadi nr. 31-2013/2017 ei la revisiun dalla lescha federala davart la planisaziun dil territori entrada igl 1. da matg 2014 en vigur. Risguardond las pretensiuns dil dretg federal sto il plan directiv cantunal vognir adattaus concernent la politica territoriala allas pretensiuns novas. Naven dils 11 da november 2016 entochen ils 16 da fevrer 2017 ha giu liug la procedura da consultaziun. El rom da quella consultaziun ein 150 posiziuns vognidas inoltradas al cantun. Era la suprastanza communalia ha priu posiziun leutier. Actualmein vogn il sboz dil plan directiv cul rapport da planisaziun surluvraus e preparaus. Igl uffeci pil svilup dil territori quenta suttametter quel entochen la fin digl onn 2017 alla Regenza per approbaziun. Consequent al plan directiv cantunal vogn la Regiun Surselva a stuer reveder il plan directiv che vogn era ad esser ina directiva per las vischnauncas concernent definir las zonas da baghegiar pil futur. Enconuscentamein vogn ei buca pli a setractar dalla damonda nua enzonar niev terren da baghegiar, mobein co optimar il terren da baghegiar avon maun e co concentrar las zonas gia surbaghegiadas resp. disponiblas.

4. Cuntegn dalla revisiun actuala

4.1 Part

Era quei project da revisiun vegn a cuntener duas parts, numnadamein las cumparts definidas el messadi nr. 31-2013/2017:

- Incorporaziun dallas novas zonas da prighel el plan da zonas.
- Fixaziun dils spazis d'aua da flums ed uals el senn dallas prescripcziuns dalla lescha federala per la protecziun dallas auas cun risguardar quellas retschercas el plan da zonas.
- Purificaziun dallas zonas da baghegiar en connex cun la purificaziun dils plans da zonas da prighel cun observar las pretensiuns dalla lescha federala da planisaziun. Adattar las zonas da baghegiar als basegns.
- Revisiun della lescha da baghegiar cun adattaziun allas prescripcziuns dil dretg surordinatu.

En connex cun quella revisiun duei era la situaziun davart igl areal pil diever commercial el plaunterren vegnir reponderaus. Ei quei la dretga sligiaziun per mantener l'attractivitat dil center dil Vitg ni basegna ei mesiras accumpignontas/directivas per sustener quei areal? Necessari vegn ei era ad esser da discussiunar instruments da formaziun. Vala ei la peina da mantener il maletg da nos vitgs, quei era cun risguard sin ina buna qualitat turistica? Sco menziunau ell'introducziun vegn il plan directiv cantunal ad influenzar decisivamein questa revisiun dalla planisaziun locala.

4.2 Lescha federala davart las habitaziuns secundaras

La lescha federala davart habitaziuns secundaras possibilitescha alla vischnaunca da reglar la damonda davart la midada da hotels en habitaziuns secundaras (art. 8) e la pusseivladad da realisar habitaziuns en objects digns da vegnir protegi pertucont il maletg dil vitg (art. 9). Concernent la midada da hotels en habitaziuns secundaras retracta ei era dalla damonda, schebein ei schai egl interess dalla vischnaunca e dalla regiun da desister dils hotels, sch'ins vul mantener l'attractivitat turistica dalla regiun e schebein ins vul saver disponer el futur d'ina certa infrastructura da loschament, aschinavon ch'ins vul era el futur organisar arranschaments da muntada surregiunalala sco quei ei stau il cass il temps vargau. Tals arranschaments han era ina muntada da reclama per nossa regiun. Tier art. 9 vai per saver nezegiar las pusseivladads che la lescha federala lubescha, tonpli ch'ei vegn ad esser pli sempel da fixar ils objects digns da vegnir protegi el rom dalla planisaziun locala.

Il cussegliader giuridic recamonda da reglar cunzun la part dalla midada da hotels en habitaziuns secundaras en ina lescha separada. Eventualmein po ei era esser pusseivel d'accelerar quella part dil project da revisiun. Denton vegn era quella part dalla planisaziun locala a basignar ina procedura da cooperaziun.

5. Procedura da cooperaziun

La procedura davart la revisiun dalla planisaziun locala vegn definida ella lescha davart la planisaziun dil territori pil cantun Grischun. Ensemene cugl uffeci pil svilup dil territori dil cantun Grischun vegn ei ad esser necessari da coordinar il cuntegn e la procedura dil project da revisiun.

Las damondas davart la zona da prighel sco era la definiziun dil spazis d'aua vegnan reglai per gronda part entras il dretg surordinatu. Perquei ha la vischnaunca pauc spazi d'influenzar quellas parts dalla planisaziun. Schegie che las zonas vegnan definidas entras conclus dalla vischnaunca e che las autoritads cantunalas nezegian mintga caschun da menziunar che quellas zonas seigien vegnididas relaschadas dalla vischnaunca, ei il conclus communal sulettamein ina decisiun formalda prescreta entras directivas cantunalas e federalas.

Concernent las ulteriuras damondas para ina procedura da cooperaziun empaui pli detagliada dad esser indicada, tonpli che quei impurtont pass d'ina planisaziun locala ha anflau a caschun dallas davosas revisiuns empaui pauc'attenziun. A vesta dalla complexitad dalla materia vegr ei ad esser grev da definir gia oz il spazi enteifer il qual la revisiun parziala dalla planisaziun locala duei vegnir terminada.

6. Planisadra

Nossa planisadra Esther Casanova ha suttamess in'offerta ch'ensiara suandontas lavurs:

1. Consequenzas dalla lescha federala davart habitaziuns secundaras, midada da hotels en habitaziuns;
2. Elavurar directivas per objects digns da vegnir protegi el senn digl art. 9 dalla lescha davart habitaziuns secundaras;
3. Mesiras en connex cul plan directiv cantunal concernent la colonisaziun, mesiras per mobilisar il terren da baghegiar;
- 3.1 Elavurar resp. surluvrar il maletg empalont ensemble cun la populaziun;
4. Surluvrar las zonas da prighel, adattar las zonas da baghegiar e purificar conflicts;
5. Surprender ils spzis d'aua per flums ed uals, purificar conflicts;
6. Pendenzas en connex cun la davosa revisiun tenor conclus dalla Regenza;
7. Surluvrar e preparar ils plans e rapports da planisaziun;
8. Coordinaziun;
9. Proceduras.

Per sia lavur ha la planisadra suttamess in'offerta da frs. 127'364.--.

7. Cuosts

Per questa revisiun dalla planisaziun locala quenta la suprastonza communalia cun suandonts cuosts:

Cuosts da planisaziun, offerta Esther Casanova	frs. 127'364.--
Cussegliaziu giuridica, lescha habitaziuns secundaras (schazetg)	frs. 15'000.--
Expertisas	<u>frs. 15'000.--</u>
	frs. 157'364.--
Nunpreviu ca. 10%	frs. 15'636.--
Cumissiun da planisaziun	<u>frs. 20'000.--</u>
Total	frs. 193'000.--

8. Ponderaziuns finalas

Cun quella revisiun dalla planisaziun locala vul la suprastonza communalia sclearir entginas pendenzas ch'ein sedadas el decuors dils davos onns sco era talas ch'ein dispiteivlas e che vegnan a caschunar discussiuns animadas. Cunzun la purificaziun dallas zonas da prighel sedadas sin fundament dallas cartas da prighel d'aua gronda, mo era las consequenzas en connex cun la realisaziun dallas prescripziuns dalla lescha federala davart la planisaziun dil territori vegnan a caschunar discussiuns animadas. E buca il davos vegn l'applicaziun dalla lescha federala davart habitaziuns secundaras a svegliar discussiuns. Per saver realisar quels projects basegna ei la collaboraziun da tuts pertuccai.

9. Proposta

Sin fundament dallas ponderaziuns suramenziunadas

p r o p o n a

la suprastonza communal al cussegli da vischernaunca:

- da conceder in credit da frs. 193'000.-- per la revisiun parziale dalla planisaziun locala.

Suprastonza communal Disentis/Mustér
Il president: Il canzlist:



Robert Cajacob



Andri Hendry

Disentis/Mustér, ils 3 d'avrel 2017

Q:\011 Legislatiun\Cuss 2017-20\Messadis\me1706_Credit per revisiun parziale dalla planisaziun locala.docx